

KALATE BAA PÉTRUS A NGA TILI

Mebatan

(1 Pét 1: 1, 2; Yuda 1, 2)

1 1 Ma Simon Pétrus, mboésaaé a nlômane Yésus Krist, m'atili ba be nga nyoñe mbunan fô'ô jijia ane bia e zôsôa Zambe wongan été a Nyii Bôte Yésus Krist ; 2 mvam a mvo'é bi bo'ok abui abui e be mia mfa'a ya ñyemane Zambe a Yésus Nti wongan.

Benyoñe ngabe ya éyeka'a Zambe

(Yôh 17 : 2, 3 ; Fil 1 : 9-11 ; 3 : 8-14 ; Tit 2 : 11-14 ; Behéb 6 : 11, 12)

3 Aval ane ngul Zambe é nga ve bia mam mese me ne ma ya ényiiñ a woñe Zambe, amu ñyemane ya nyô a nga loene bia e duma dé émien été a étôto' jé, 4 amu mme a nga ve bia bidima metiñ bi ne étua anen, amu ajô mam mete mi ne ngule ya tup bibole bi mam bi ne e si ndône nyô amu mbia nkômban, nde mi bo benyoñe ngabe ya éyeka'a Zambe. 5 Ajô ete, bo'an ôdidi'i ôse na mi kô'ôlan éjjine ntaban e mbunane wônane yôp, 6 e ñyeman e yôp njôane nlem, e njôane nleme yôp njiban, e njibane yôp woñe Zambe, 7 e wôñe Zambe yôp énye'esane bobenyañ, e énye'esane bobenyañe yôp nye'an. 8 Amu nge mame ma me ne émmenan, me bulu fe bo abui, m'aye kamane mia na mi bo te bo mintetek nge minkôkôm e ñyemane Krist Yésus Nti wongan été. 9 amu nyô ase a jembane mam ma a ne ndindim, teke yen ôyap, a vuaneya fe na a nga mane tuneban mfa'a ya minnôm mi mam abé mié. 10 Ajô ete, A bobajañ, mi dañane ve ngule ya yemete nloen a ntoban wônane na bi bo été, amu na, nge mi abo nalé, mi aye bo teke'e ku; 11 nalé ate nyiane ya nyiin e éjôé ya nnôm éto e be Nti wongan a Nyii Bôtô Yésus Krist w'aye bulu nen abui e be mia.

Jam Pétrus a tili be de

(Mat 17 : 1-6; 2 Tim 3: 16; 1 Pét 1: 10-12; 1 Yôh 1 : 1-4)

12 Ajô ete m'avañ kom ése na me simesane mia mam ma, akôsabo m'ayeme fe me, mi yeme fe ngul e benya mejô mi bili été. 13 M'asimesane na e ne zôsô na, nté me ngenane me too e ébeme ji été, m'ayiane fô'ô ôsimesane vienan, 14 amu m'ayem na asotane ya ébeme jam e ne atemetem, aval ane Krist Yésus Nti wongan a nga kpwaane ma. 15 Nde m'aya'a na, e nkôlane wom, mi bo ngul éyoñ ése na mi simesane mam mete.

Beyene ya étôto'o Krist

16 Amu bi nji ke tôñe bibubui mefe'e ya minkana éyoñ bi nga kate mia ngul a nsoane Krist Yésus Nti wongan, ve biabebien bi mbe beyen ya beta étôto'o' wé. 17 Amu éyoñ a nga nyoñ étôto'o duma e be Esaa, nde fe tyiñ é nga kui e be nye a Beta Etôto'o Ennen na,

Rev. Matthias MEYE

Secrétaire Général 1961

“E nyô nnye a ne Mone wom m’anye’e, nnye m’ayene mvaé,” 18 bi nga wô’ô tyiñe é so’o yôp amu bi nga tele vôme wua a nye e mfufube nkôl ôte. 19 Nde bi nga bi éfia nkulumejô éte ngu. Mi aye bo mvaé ya ba’ale je aval ane lambe a faé vôm a ne dibi, akui ane tyé j’amane lende, ôtété tyé ô nga tôô mia e minlem. 20 Yemane jame dina na, bifia bi nkulumejô bise ya kalate môêt émien a nji timi bie, 21 amu bifia bi nkulumejô bi nji tame kuluban melu kôa a nkômbane môêt émien, ve a ngule Mfufub Nsisim nje bôt be nga kobô a je bifia bi so’o e be Zambe.

Nzuane beye’ele minsos

(M.M. 20 : 29, 30 ; Yuda 3-7 ; Nkul 2 : 1, 15)

2 1 Nde bekulumejô minsos be nga tebe e be bôt, avale fe ane beye’ele minsos b’aye bo e be mia, mmbe b’aye zu a minkandane mengam ya njañan, nde b’aye kat ja’ana Nti a nga kuse be, b’aye zu a atemetema njañan e be bebien. 2 Nde abui bôt d’aye tôñe mbia biso’o biap, akekui zene benya mejô ve biaséban e mise map. 3 Nde fe amu ôzañ akume wop, b’aye kuane mia nkuane medu’an; aso melu kôa mekua map me nji ke te’elan, nde fe njañane wop ô nji ke ke ôyo.

Nzuane Môse ntyi’ane mejô

4 Amu na nge Zambe a nga bo te liñ beéngéle be nga bo abé, ve a nga wua be e Etôtôlan, a nga mane be fiti e bibé bi dibi, ane b’aye yange ntyi’ane mejô ; 5 nge a nga bo te ke liñ si ya melu kôa, ve a nga kale Nôa, zôsôa nkatefoé, wua ya bôte muam, éyoñ a nga zuu ndôn e si mfa’a ya bôte be ne te ko Zambe woñ ; 6 Nge mfa’a ya nkôñelan a nga kôñelan minlam mi Sodom a Gômôra asup, nde a nga bo na mi mane jañ, nde a nga lí’i fe mie ane ndem e be ba b’aye bo te ko Zambe woñ : 7 nde a nga nyii Lot, zôsôa môêt, nnye a nga dañe wô’ô mintae e nlem amu mbia bisô’ô ya mbia be bôte bete 8 (amu na zôsôa môêt ate a nga bo a yenek, a wôk, éyoñ a nga too baa be be, a nga bo awô’ô ôlun e nsisime zôsô wé été môs ane môs amu mimboane miap ya ntyamane memvinda), 9 nde Nyi a yem aval ane ngule ya nyii beko Zambe woñ mfa’a ya meve’ele, a aval ane a fiti bikotekote bi bôt e meleb été akekui e môse ntyi’ane mejô, 10 adañedañ ba b’amane vô a mbia minkômbane mi abolô menyô, be biasé’é fe éjôé.

Biyo’é beye’ele minsos

Bezômbômam a bôte melo, be ne te ko woñ ya kobô bitôto’o bi bôt abé, 11 vôm beéngéle, ba be ne éwôlô a ngu, be ne te tote mekua me ébiasé mfa’a wop asu Nti. 12 Ve balé, ane betit be ne te fek, betite minsôm be nga bialé na be biban a wôéban, b’abo ébiasé mfa’a ya mam b’adimi, b’aye jañ njañan ôte wuwua fufulu a be, 13 nalé b’aye tôban a melebe ya abé dap. B’abuni na e ne mbamba jam na be bo bijañ e zañe môs. Be ne mvin a bijô, b’abo medu’an éyoñ b’abo bindamane biap éyoñ b’adi mia be be. 14 Be bili mis me ne njalan a mejian ne lut, teke’e kate mboan abé. B’awone bôt be ne minlem biyebeyebe. Be ne bone biyo’é. 15 Be lí’iya zen é ne zôsô, nde be yaleya feñ; be nga tôñe zen Balaam, mone Béor, nnye a nga nye’e ma’ane ya mboane abé, 16 nde a nga nyoñe melep amu ntyamane mvinda wé émien; mvumvu’u éjakas ô nga kobô tyiñe môêt, ô nga kamane nsusu’u nkulumejô ôte.

Belo be mvin

17 Be ne bivevelé menjeñ, minkut mi atindiban a évuñulu; dibi ya Etôtôlan e nga naaban mfa'a wop. 18 Amu na, éyoñ b'akobô bivuvu'u mejô ya ngunguan, mbia nkômbane ya minsôn été, a mame ya mbia bisok, b'awone ba be tatéya mate ba be too e nkoban été; 19 B'aka'a be éto nti, éyoñ éte bebien be to belo ya bibole bi mam, amu na, jam e dañeya mô, nde fe d'abo nye ôlo. 20 Amu na, éyoñe be nga mane tup mvine mam ya si ndône nyô amu ñyemane b'ayeme Nti wongan a nyii bôt Yésus Krist, nge be beta yembe été, a dañeban, éto j'asu'ulan j'aye dañe ji ya ôsu abé. 21 Amu e nga ye bo be mvaé nge be nga ye bo te yeme zen e ne zôsô, sa na, éyoñ be yemeya je, be bulane mvus a lí'i mfufub atíñ ô nga veban e be be. 22 E boya be aval ane bebela nkana nyô na,

“ Mvu j'abeta bulane di bendôlô bé,”

“ nge na, ngôé j'awoban j'abeta ke bum e mboto'o été. ”

Bôt bikpwe'ele ya melu m'asu'ulan

(Mat 24 : 37-39 ; 2 Tés 1 : 7-10 ; Yuda 14-19 ; Nkul 20 : 11)

3 1 Nyôna a ne kalate baa m'atili mia, A bôt m'anye'e, e bebaane été me maneya fô'ô ôsimesane vienan ane mi aye tu'a simesan ; 2 ane mi aye simesane minkulane mejô mimfufub bekulumejô a abendé Nti a Nyii bôtô e be minlômane mienan. 3 Osusua ya mese, mi ayiane yem e jame di, na bôt bikpwe'ele b'aye zu e melu m'asu'ulan b'aye zuu ébiasé, be tôñe mbia minkômbane miap, 4 be jô'ô na, ntiñetane ya nzuane wé ô ne vé , Amu nté ane bemvamba be nga mane ke ôyo, mam mese me ngenane me kele ôsu aval ane atata'a ya ntéane biôm. 5 Amu b'avañe vuane jame di na, yôp e nga boban e melu kôa a si é so'o e mendim été a amu mendim a njôane Zambe ; 6 a mbie bite si é nga too éyoñ éte ndôn é nga yandane je, é mane jañ. 7 Ve amu njôan ôte wuwua yôb a si é ne éyoñe ji bi nga naaban mfa'a ya nduan, bi ne naan akekui môse ntyi'ane mejô a njañane ya bôt be ne te ko Zambe woñ.

Môse Nti w'aye zu

8 Ve na, a bôt m'anye'e, mi bo'o te vuane na, e be Nti môse wua ô ne ve ane akuta mimbu, a akuta mimbu aval ane môse wua. 9 Nti a nji langan mfa'a ya ntiñetane wé aval ane bevo'o b'ayen nlangan, ve a jibi mia, teke nye'e na môte wua a jañ, ve ane bôte bese b'aye kui e nkôñelan nlem. 10 ve môse Nti w'aye zu avalane ñwuwup, môs ôte yôp d'aye lô a beta nduan, bitétéa bi biôm bi aye nyeme nduan, si a mimboane mi biôm bi ne été a yôp bi aye mane dik.

Mfefé yôb a mfefé si

11 Aval ane biôm bise bi aye mane nyeme nalé, za aka'a bôtô mi ayiane bo mfa'a ya ényiiñe mfuban a nkoane Zambe woñ, aval ane mi ayange, mi sulu'u nsoane môse Zambe bebé, amu a wô, yôp d'aye bo'obane nduan, a bitétéa bi biôm bi ne été bi aye mane nyemé ! 13 Ve ane ntiñetane wé ô né, bi ayange mfefé yôp a mfefé si e vôm zôsô a too.

Rev. Matthias MEYE
Secrétaire Général

Nleban ajô ngômesan

14 Ajô été, A bôt m'anye'e, amu mi ayange e mam ma, bo'an ngule na a koane mia teke'e aton nge bijô, mi too mvo'é. 15 Mi simesa'ane na, ayabe njibane Nti wongan e ne nyian; aval ane mbamba mojañe wongan Paul a nga liti mia ane fe'e é nga veban e be nye é né, 16 a nga kobô mia jame di ane a nga bo de e bekalate bé bese été. Mam mevok me ne été me ne ayaé ya wôk, mme minsusuk a bôt be ne biyebeyebe b'avit mfa'a njañane wop, aval ane b'abo mintilane mife . 17 Ajô ete, A bôt m'anye'e, amu mi yemeya jame di ôsusua, taba'ane ntyele na, mi za yale feñ e minkobane mi bebiasé mvinda, mi za dimili fe ngule ntebane jenan. 18 Ve yaéan e mvam a ñyemane Nyi wongan été a Nyii Bôtô Yésus Krist. E be nye étôtok é bo'o éyoñe ji akekui môse ya nnôm éto. Amen.



Rev. Matthias MEYE
Secrétaire Général 1961.....